

Aucunes genz dient qu'en songes
n'a se fables non et mençonges ;
mes l'en puet tex songes songier
qui ne sont mie mençongier,
ainz sont après bien aparant, 5
si en puis bien traire a garant
un auctor qui ot non Macrobes,
qui ne tint pas songes a lobes,
ancois escrit l'avision
qui avint au roi Scypion. 10
Qui c'onques cuit ne qui que die
qu'il est folor et musardie
de croire que songes aviegne,
qui se voudra, por fol m'en tiegne,
quar endroit moi ai ge fiance 15
que songes est senefiance
des biens as genz et des anuiz,
que li plusor songent de nuiz
maintes choses covertement
que l'en voit puis apertement. 20
El vintieme an de mon aage,
el point qu'Amors prent le paage
des jones genz, couchier m'aloie
une nuit, si con je souloie,
et me dormoie mout forment, 25
et vi un songe en mon dormant
qui mout fu biaus et mout me plot ;
mes en ce songe onques riens n'ot
qui tretot avenu ne soit
si con li songes recensoit. 30
Or veil cel songe rimeer
por vos cuers plus feire agueer,
qu'Amors le me prie et comande.
Et se nule ne nus demande
comant je veil que li romanz 35
soit apelez que je comanz,
ce est li *Romanz de la Rose*,
ou l'art d'Amors est tote enclose.
La matire est et bone et nueve,
or doit Dex qu'en gré le receve 40
cele por qui je l'ai empris :
c'est cele qui tant a de pris
et tant est digne d'estre amee
qu'el doit estre Rose clamee.